



UNIVERSITÄTS-
BIBLIOTHEK
PADERBORN

Universitätsbibliothek Paderborn

**Antonii Mariae Gratiani A Burgo S. Sepulchri Episcopi
Amerini De Vita Joannis Francisci Commendoni Cardinalis
Libri Quatuor**

Graziani, Antonio Maria

Parisiis, 1669

Cap. III. De prima ejus institutione.

urn:nbn:de:hbz:466:1-9616

retur, ad officiaque discurrentes in os incidens impediret, tamen nullâ territus re, vno adjuvante cubiculario ejus Dionysio Viterbio Patavino, qui solus expers naufragii fuit, ad omnia nautarum munia occurrens, eisque despondentes jam animum, nunc oratione, nunc vltro subeundo opera eorum confirmans navem servavit, cum sequenti die luce ortâ deservisset tempestas, & reddita mari tranquillitas esset. Ne fluminibus quidem vnam sine adversis casibus navigavit. Vitandam omnem navigationem, mari, aquaque abstinendum, quod fatale inde periculum immineret, prædicentes quosdam, & monentes amicos, risit semper, nec quoties res, atque opportunitas tulit, propterea committere se mari, nayibisque est veritus.

De prima ejus institutione.

CAPUT III.

SUMMA Patris cura institutus est; nam pene infans specimina ingenii dederat, & ab Astrologis ingentia, atque summa portendi, talium haud incurioso Patri responsum erat. Vix decimum annum agens Latina carmina non scriptabat solum, sed etiam de re proposita ex tempore edebat, eratque propterea in amoribus Principum civitatis, quorum amicitia florebat
Pater,

COMMENDONI CARD. 9

Pater, vt multi ad ludum, vbi cum æqualibus instituebatur, ventitarent, quo pueri ingenium in ejus ætatis exercitationibus spectarent, cognoscerentque an famæ, quæ de eo inter aliorum parentes puerorum erat, responderet, nec alio ferè cohortandi, aut increpandi liberos loco vterentur, quàm vt ejus ad imitandum exemplum proponeant. Magister illi erat Bernardus Felicianus, vir quidem eruditus, ac diligens, sed quod fateri ipse, ac præ se ferre soleret, Commendoni ingenio, quàm suo majorem in civitate famam adeptus. Unde cùm multi ad eum è Patriis primorum filii ducerentur, ipse tamen vnius excellenti indole, atque acumine gloriaretur, eoque studiosius, & majori curâ omnibus doctrinis informabat, instituebatque, quas puerilis illa capere ætas potest. Ab hoc ad Antonium Ariam Hispanum nobilem Grammaticum se contulit, eodemque tempore Antonio quoque Eparcho ab Zacintho Græcarum litterarum Doctore est usus, & ipse puer ad omnem disciplinam cùm mirè docilis, tum quod paucis admodum usu venit, memoria summa ad ea, quæ doctus esset retinenda erat; nam à quibus celeriter res percipiuntur, iis etiam facilè solere excidere, & contrà qui laboriosè discunt, firmius omnia aiunt retinere; veluti impressa difficilius, quàm quæ modò illita sunt, delentur. Magnopere autem videbatur animus ejus teneri commemoratione insignium Virorum, qui per virtutem ad magnam aliquam gloriam, ho-

B

norémque pervenissent, eorúmque egregia facinora adeò cupidè audiebat, vt sàpè ab ore narrantium talia penderet, sàpè Patrem, Magistrúmque oraret, vt fibi de claro aliquo viro commemorarent: sive ea pueri natura, quod illi ætati accidere solet, curiosior fuit, sive animus ejus jam tum magnæ laudis spem affectans, narratio-ne alienæ virtutis gestiebat. Quartum-decimum agens annum Patavium à patre discendi causâ est missus, vbi plures annos in optimis disciplinis magnâ ingenii gloriâ est versatus, captus primò Poëtarum suavitate, ita se Poëtices studiis, legen-disque, ac scribendis carminibus dedidit, vt inde vel præcipuam sibi famam comparaverit, tanto quidem majori immaturæ ætatis ejus admiratio-ne, quanto non æqualibus modò suis in eo gene-re celeriter antecelleret, verùm etiam cum clari-s viris conferebatur, qui Poëtices laude præsta-re tum existimabantur. Philosophiam deinde ag-gressus doctissimos homines audivit, aviditate ingenti Philosophorum præcepta hauriens, maxi-mè Platonis sapientiâ delectatus, propterea quòd illum diceret propriùs, quàm cæteros à Christia-næ Philosophiæ institutis abesse. Multos ejus li-bros exercendi ingenii causâ è Græco in Latinum vertit, omnes fere explicatione rerum, quæ ob-scuriores essent, illustravit. Hi postea commen-tarii ejus in manus nostras pervenerant, quos stu-diosè conservatos à nobis, cùm fortè ipse multos post annos reperisset, conscidit, atque incendit,

sanè immerentes. Verùm dum his disciplinis adolescens cupidè animum imbuit, & discendi dulcedine studiis nullâ valetudinis curâ usque indulget, nullumque sibi legendi, ac meditandi modum statuit, in periculosem, atque importunum incidit morbum oculorum, quo magnopere illi retardatus, ac pæne interclusus est omnis suscepτæ laudis cursus. Ab succo nimio corporis vis magna sanguinis in oculos influens aciem obduxerat, curatione adeò difficiili, ut cum multa experto infeliciter omnia procederent, etiam ipsum quadriennium inclusus conculavi, atque impatiens lucis vim infesti humoris, neque exsiccare, neque aliò derivare ullis remediis præstantissimis adhibitis medicis valeret, desperata valetudine, de illa ipsa Terentiana domo ad Vallis prata, quam Patavii conductam inhabitabat, emenda, omnique deinceps vita ibi agenda cogitaverit. Tandem Joannis Baptista Montani Veronensis Medicorum tum longè principis consilio, cautelum sinistro in crure cum fecisset, sive id reperatum mali remedium, sive suâ sponte consumpta vis morbi esset, lumen ei est restitutum, ita integrâ acie, ut qui acutiùs, aut longius cerneret, qui celerius objecta oculis percurreret, fuerit postea nemo. Toto verò illo tempore, quo oculorum captus usu in tenebris egit, quamquam omnis ejus fuerit studiorum ratio perturbata, non tamen ipse se desidiæ, aut languori dedit: Verùm aut dictandis carminibus, quâ rē maximè adole-

B ij

scentis animus recreari videbatur, temporis ejus molestiam lenibat, aut legenti operam dabat, solatia mali inde petens, vnde contraxerat. Cùm maximè morbo vexaretur, patrem amisit octo & septuaginta annos natum, cùm esset ipse decem & novem annorum; cuius morte magnam fecit familiaris rei jacturam, quæ illi tota comminuta, ac dissipata est, cùm curare ipse res domesticas nec per ætatem, nec per valetudinem quiret, & Marcus Antonius Barbadicus avunculus ejus, qui tueri adolescentis rem debuit, homo effrenatæ avaritiæ etiam diripuit. Quæ tamen ipse damna haudquaquam quanti erant æstimavit, doctrinarum cupidine occupatus, & omnibus curis de- pellendo morbo intentus. Cùm convaluisse, consilio eorum quibus à patre fuerat commendatus, ad cognoscendum Jus Civile animum nequaquam libenter traduxit. Quo ipso in studio vt pares ab eadem celeritate ingenii progressus faceret, eoque magnopere lætarentur, quibus auctoribus eam doctrinæ viam ingressus erat, tamen Platoniæ, & Philosophorum consuetudinem vt abjiceret adduci cuiusquam auctoritate non potuit; & animus jam tum gestiens enitendi, & nayandi aliquid studio, in iis maximè virtutis præceptis constitit, quibus ad res gerendas, vitamque in hominum luce agitandam instituitur, frustra suscipi putans rerum abditarum scientiam, nisi ea ad hominum usum, utilitatémque comparetur. Eloquentiæ exercitationes omnes, sine qua ipsa

vix ratio satis tueri munus suum posse videtur, ingenti labore est persecutus, scriptitando, declamando, colloquendo. Nam & juvenis æqualis sui ob cædem factam capit is arcessiti causam Patavii apud Prætorem egit, tenuitque. Et cùm Pataviniorum civitas Francisco Donato Reipublicæ principatu de more gratulatum misisset, orationem, quam Legati habuere, ipse composuit. Quo ex studio id sanè est adeptus, quod posteà magno ei fructui, ac decori fuit, vt promptâ, & expeditâ dicendi facultate rem propositam seu patriâ, seu Latinâ oratione, vel continuatâ, & productâ, si res desideraret, ita explicare, ac peragere posset, vt cùm nihil conquirendis verbis, aut jungendis hæsitaret, quod plerisque accidere solet, genus orationis minimè inquinatum, ac barbarum, & certè, quod difficillimum est, æquabile, & vnde-
quaque sui simile teneret.

*De profectione ejus ad videndam urbem, et
quo auctore eam suscepit.*

C A P U T I V.

I ACTIS per has maximè artes reliquæ vitæ fundamentis, motaque apud omnes magnâ sui expectatione ad vigesimum quintum ætatis annum pervenit, vt erecto ad res capessendas animo ita haud satis certus quam vitæ rationem se-

B iij